



KENYATAAN MEDIA

GESA TINDAKAN SEGERA MEMBENDUNG JANGKITAN COVID-19 DI KALANGAN KANAK-KANAK

Hari ini saya telah membuat pemantauan dan tinjauan terhadap penyampaian perkhidmatan kebajikan oleh petugas Jabatan Kebajikan Masyarakat (JKM) dan petugas-petugas di Pusat Kuarantin dan Rawatan Bersepadu COVID-19 (PKRC) di MAEPS Serdang. Tinjauan dan pemantauan ini bertujuan untuk memastikan keberkesanan penyampaian perkhidmatan kebajikan oleh petugas-petugas barisan hadapan kepada kumpulan sasar di bawah Kementerian yang telah ditempatkan di PKRC MAEPS akibat jangkitan COVID-19, termasuklah 168 orang kanak-kanak.

Peningkatan jumlah akumulatif jangkitan COVID-19 di kalangan kanak-kanak daripada pelbagai peringkat umur adalah amat membimbangkan dan saya berharap agar perhatian segera dapat diberikan oleh semua pihak terhadap perkembangan terbaru ini. Sehingga 18 Mei 2021, dilaporkan seramai 64,046 orang kanak-kanak telah dijangkiti oleh COVID-19 dan peningkatan ini amat tinggi jika dibandingkan dengan jumlah seramai 8,369 kes kanak-kanak dijangkiti COVID-19 yang dilaporkan sepanjang tahun 2020.

Sebagai Menteri yang bertanggungjawab ke atas kebajikan dan pembangunan kanak-kanak di negara ini, **saya ingin menggesa agar kesemua pihak khususnya ibu bapa, penjaga, pengendali pusat jagaan kanak-kanak, pengusaha/pengasuh TASKA, dan pihak-pihak lain yang mempunyai hubungan dan interaksi terus (*direct interaction*) dengan kanak-kanak supaya meningkatkan kesedaran tentang bahaya jangkitan COVID-19. Ini supaya mereka lebih proaktif untuk menilai perkara-perkara yang dapat meminimumkan risiko jangkitan COVID-19 terhadap kanak-kanak. Semua pihak perlu memainkan peranan untuk memastikan kanak-kanak sentiasa mematuhi SOP dan pastikan tidak membawa kanak-kanak keluar ke tempat awam kecuali bagi tujuan kecemasan, rawatan dan pendidikan.**

Saya menyeru kepada semua ibu bapa dan penjaga agar memberi keutamaan terhadap penjagaan dan tahap kesihatan kanak-kanak. **Kanak-kanak perlu dididik dan diberi maklumat tentang pematuhan SOP dan mengamalkan Perintah Kawalan Pergerakan (PKP) sendiri bagi mengelak daripada dijangkiti virus COVID-19. Saya akan terus berusaha untuk memastikan kepentingan terbaik kanak-kanak (*the best interest of a child*) di negara ini sentiasa terpelihara.** Di samping itu, dalam menangani peningkatan ini, saya menyarankan agar kajian terhadap tahap keberkesanan vaksin untuk kanak-kanak di bawah umur 18 tahun dipercepatkan supaya kadar peningkatan jangkitan kepada kanak-kanak dapat dikurangkan. Saya juga menggesa agar 18,621 orang pengasuh di 5,326 buah TASKA yang berdaftar dengan JKM diberi keutamaan untuk mendapatkan vaksinasi bagi memastikan persekitaran yang terbaik untuk kanak-kanak terjamin.

Saya juga mengulangi komitmen untuk terus membantu usaha Kerajaan dalam **memastikan sekurang-kurangnya 80 peratus rakyat menerima vaksin bagi mencapai imuniti kelompok (*herd immunity*) menerusi Program Imunisasi COVID-19 Kebangsaan (PICK).** Saya juga akan sentiasa bekerjasama dengan Kementerian Sains, Teknologi dan Inovasi (MOSTI), Kementerian Kesihatan Malaysia (KKM) dan Jawatankuasa Khas Jaminan Akses Bekalan Vaksin COVID-19 (JKJAV) dalam hal ini.

Pada masa yang sama, saya juga telah menyumbang barangan berupa alat permainan kanak-kanak yang telah disampaikan melalui pihak pengurusan PKRC untuk kegunaan kanak-kanak yang dijangkiti dan sedang mendapat rawatan di PKRC ini. Lindung Diri, Lindung Semua.

YB Datuk Seri Rina Mohd Harun
Menteri Pembangunan Wanita, Keluarga dan Masyarakat
28 Mei 2021